

ԳԱԳԻԿ ՀԱՐՈՒԹՅՈՒՆՅԱՆ

ՀԱՅՈՑ ԿԱԹՈՂԻԿՈՍՈՒԹՅԱՆ ՏԵՂԱԳՐԱԿԱՆ-
ԿԱՆՈՆԱԿԱՆ ԿԱԶՄԱԿԵՐԴՄԱՆ
ԱՌԱՆՁՆԱՀԱՏԿՈՒԹՅՈՒՆՆԵՐԸ ԵՎ
ՀԵՌԱՆԿԱՐՆԵՐԸ ԺԳ ԴԱՐՈՒՄ-ԺԴ ԴԱՐԻ ՍԿԶԲԻՆ

Վերջին տարիներին հայոց եկեղեցու պատմությանը նվիրված ուսումնասիրություններում տեղ են գտել նոր հարցադրումներ, որոնք թույլ են տալիս վերագնահատել նրա գործունեության հետ կապված ավանդական պատկերացումները: Նման մոտեցում անհրաժեշտ է դրսևորել նաև ժԳ դարի-ԺԴ դարի սկզբի հայոց եկեղեցու պատմության մի շարք հիմնախնդիրներ նորովի ներկայացնելու և պարզաբանելու համար: Խոսքն ամենից առաջ վերաբերում է հայոց կաթողիկոսության տեղագրականոմական կազմակերպման խնդիրներին, առանձնահատկություններին և հեռանկարներին: Խնդրո առարկա ժամանակաշրջանում հայոց կաթողիկոսության ավանդական կազմակերպման վերակառուցման հետ աղերսվող հիմնախնդիրների առաջացումը կապված էր հայկական միջավայրերում տեղի ունեցած որոշակի փոփոխությունների հետ:

Հայկական էթնիկական ընդհանրությունը Մեծ Հայքից դուրս զբաղեցրել էր այլ տարածքներ և յուրացրել ինքնակազմակերպման նոր հատկանիշներ, ուստի խախտվել էին ավանդական պատկերացումները էթնոսի տեղագրական կազմակերպման սահմանների և սկզբունքների վերաբերյալ: Ձևավորված իրավիճակում հայոց եկեղեցին պետք է փորձեր Մեծ Հայքից դուրս տարաբանկեցված հայերին պահել իր ազդեցության շրջանակներում: Սա նոր խնդիր չէր, սակայն ժԳ դարի առաջին կեսին տեղի ունեցող փոփոխությունները այլ ճանապարհներ էին առաջադրել: Հայոց թագավորության հռչակումը Կիլիկիայում ևս իր կնիքը դրեց եկեղեցու գործունեության, մասնավորապես կաթողիկոսության կազմակերպման և կառուցվածքի վրա: Խնդիրը ոչ այնքան այն է, որ եկեղեցին սովորաբար իր կազմակերպման ձևերը գտնում է քաղաքական համակարգի շրջանակներում, որքան Կիլիկիայում հայկական պետականության առաջացումը փոխել էր ավանդական պատկերացումները էթնոսի քաղաքական կազմակերպման սահմանների վերաբերյալ: Արտաքին միջավայրում տեղի ունեցած կարևոր փոփոխություններից էին՝ բյուզանդական

կայսրության թուլացումը, մոնղոլական արշավանքները, Եգիպտոսի հզորացումը, խաչակրաց տիրությունների անկումը և պապականության արևելյան քաղաքականության ակտիվացումը:

Ամիի Բագրատունյաց թագավորության անկումից հետո կաթողիկոսական աթոռը շուրջ հարյուր տարի դեգերումներից հետո հաստատվեց Եփրատ գետի ափին գտնվող Հռոմկլա բերդաքաղաքում: Տեղի ընտրությունը պատահական չէր, քանզի մեծ քանակությամբ հայ բնակչություն հաստատվել էր Փոքր Ասիայի կենտրոնական և հարավ-արևելյան շրջաններում: Այստեղ տեղի էին ունենում հայ հասարակության քաղաքական ինքնակազմակերպման նոր գործընթացներ, որոնց մասնակցում էր նաև պետականության որոշակի հատկանիշներով օժտված հայոց եկեղեցին: Քննարկվող ժամանակաշրջանում Մերծավոր Արևելքը վերածվել էր միջազգային հարաբերությունների բարդ հանգույցի, ուր բախվում էին քրիստոնեության և իսլամի, ինչպես նաև քրիստոնեության տարբեր ուղղությունների շահերը և հետաքրքրությունները: Տարածաշրջանում շոշափվող խնդիրները այս կամ այն կերպ աղերսվում էին նաև հայկական էթնիկական ընդհանրության հետ, ուստի հայոց կաթողիկոսությունը չէր կարող չներքաշվել Մերծավոր Արևելքում ձևավորվող գործընթացներում: Փաստորեն հայոց կաթողիկոսությունը ԺԳ դար թևակոխեց մի շարք խնդիրներով ծանրաբեռնված, որոնցից առանձնակի կարևորություն էր ստացել կանոնա-տեղագրական միակենտրոն համակարգի ձևավորումը. «Արդ, ի հայրապետութեանն ոչ զիտեմ ասել եթե զում զրեցից անուն, այլ ասեմ թե երից հակառակաց՝ տէր Յովհաննիսի, տէր Անանիի եւ տէր Դաւթի...»¹:

Հովհաննես Չ Սսեցի. Հռոմկլայի կաթողիկոս

Անանիա Սեբաստացի. Սեբաստիայի կաթողիկոս

Դավիթ Արքակաղնեցի. Սսի կաթողիկոս

Այս ցանկին պետք է ավելացնել նաև Աղվանքի, Աղթամարի և Ամիի կաթողիկոսությունները: Նման իրավիճակը երկար չտևեց. սակայն չհաջողվեց այն ամբողջովին հաղթահարել, քանզի Հռոմկլայի կաթողիկոսությանը զուգահեռ իրենց գոյությունը պահպանեցին Աղվանքի և Աղթամարի կաթողիկոսությունները:

Հռոմկլայում հաստատված կաթողիկոսությունը դիտվում էր որպես համահայկական, սակայն ձևավորված իրավիճակում այն ավելի շուտ խորհրդանշական բնույթ ուներ, քան իրողություն էր: Հայոց կաթողիկոսության

¹ Հայերեն ձեռագրերի հիշատակարաններ, ԺԳ դար, կազմեց՝ Ա. Մաթևոսյան, Երևան, 1984, էջ 75:

կազմակերպումը Մեծ Հայքում հանգրվանում էր այնպիսի հատկանիշների վրա, որոնց մի մասը նոր պայմաններում իրենց չէին կարող գտնել: Համահայկական կարգավիճակ ձեռք բերելու համար Հռոմկլայի կաթողիկոսությանը անհրաժեշտ էր լուծել մի շարք խնդիրներ, մասնավորապես յուրացնել կենտրոնին հատուկ հատկանիշներ և մշակել այն սկզբունքները, որոնց միջոցով պետք է կարգավորեր փոխհարաբերությունները տարաբնույթ միջավայրերում գտնվող թեմերի հետ: Համահայկական կենտրոնին հատուկ հատկանիշները կարելի է ստորաբաժանել. կանոնական, տեղագրական, մշակութային և արժեքային կողմնորոշման:

Նախ փորձենք պարզաբանել կենտրոնի խնդիրը: Ձարգացման որոշակի աստիճանի հասած յուրաքանչյուր հասարակություն փորձում է ստեղծել մշակութաքաղաքական կենտրոն: Անիի Բագրատունյաց թագավորության անկումից հետո հայ հասարակության համար ևս նման խնդրի լուծման անհրաժեշտություն առաջացավ: Կիլիկիայում առաջացած հայկական պետականությունը, Ձաքարյանների և Օրբելյանների իշխանությունները Հայաստանում փորձում էին իրենց վրա վերցնել կենտրոնի գործառույթները:

Կենտրոնը կամ մշակույթի կենտրոնական գոտին էթնոսի մշակութային մոդելի մեջ ներառված ավանդույթի, արժեքների, գաղափարների, որոնց միջոցով կառավարվում է տվյալ հասարակությունը, հավաքատեղին է: Եթե համահայկական քաղաքական կենտրոնը բացակայում էր, ապա Հռոմկլայի կաթողիկոսությունը պետք է փորձեր յուրացնել մշակութաքաղաքականական կենտրոնին անհրաժեշտ հատկանիշներ:

Այժմ փորձենք պարզաբանել այն սկզբունքները, որոնց միջոցով Հռոմկլայի կաթողիկոսությունը պետք է կարգավորեր ենթակենտրոնների գործունեությունը:

Ա Կանոնական. քրիստոնեական եկեղեցին կազմակերպվել էր ուղղահայաց սկզբունքով և հարաբերությունները կարգավորվում էին կանոնական իրավունքի սահմաններում: Այս կառույցը յուրացրել էր նաև հայոց եկեղեցին:² Պարզ է, որ հայոց կաթողիկոսությունը աշխատում էր պահպանել կանոնական գերակայության իրավունքը, քանի որ նա էր ապահովում եկեղեցու կազմակերպման աստիճանակարգությունը և թեմական բաժանումը: Վերջինս առավել կարևոր էր հայոց կաթողիկոսության համար, քանզի թեմերի մի մասը գտնվում էին տարաբնույթ միջավայրերում. «Եւ ոչ ամենեւին ի սահմանադրութեանց

² Սմբատ Սպարապետ, Պատաստանագիրք, Հավաքական տեքստը, ռուսերեն թարգմանությունը, առաջաբանը և ծանոթագրությունները Ա. Գալստյանի, Երևան, 1958, էջ 26-27:

եկեղեցոյ՝ եւ ոչ ի սահմանաց թեմերոց իշխեւ որ փոփոխել բնաւ առանց կաթողիկոսի՝ որ մեծ ժողովի տեսով այնէ»³:

Բ Տեղագրական կազմակերպման շրջանակներում լուծվում էր այնպիսի կարևոր խնդիր, ինչպիսին է կանոնական գերակայության սահմանների ճշգրտումը: Սա կարևոր էր նրանով, որ տեղագրական կազմակերպման շրջանակներում հաճախ առանձնացվում էին կարգավիճակային ենթակետերը: Տեղագրական կազմակերպման շնորհիվ կանոնական աստիճանակարգությունը ստանում էր տարածական սահմաններ:

Գ Մշակութադավանաբանական. քննարկվող ժամանակաշրջանում հայկական էթնիկական ընդհանրության կազմակերպման շրջանակներում ձևավորվել էր այնպիսի իրավիճակ, երբ բացակայում էին հաստատուն հատկանիշներով օժտված էթնո-մշակութային սահմանները և կաթողիկոսության կազմակերպումը պետք է ճշգրտեր հայկականության սահմանները: Այս սկզբունքի համար կարևորը ոչ միայն տարածական հատկանիշն էր, այլև մշակութադավանաբանական նույն միջավայրին պատկանելու ինքնագիտակցումը: Փաստորեն մշակութադավանաբանական սկզբունքի շրջանակներում էր ձևավորվում հոգևոր տարածքի սահմանները, իսկ հակառակ դեպքում դրանք ձևախախտում էին. «...Կիլիկիա բոլոր՝ որ տեղի էր մեր պարծանաց, յայս իսկ վարակեալ կայ. և գլխաւոր քաղաքք որ ի Դոռոմք ի սոյն մոլորեալ են. և եհաս մինչև առ մեզ: Զի քարոզի այս յայտնապէս ի թագաւորական քաղաքն ի Տփլիս. և ի հին տունն Բագրատունեացն յԱնի՝ որ ի Շիրակ: Նաև ի Թավրեժ շահաստան և յայլ բավում տեղիս:

Ահա ո՞ւմնաց ի Դայոց ի հայրենի աւանդութեան. միայն սինլիքորքն յանկեան ուրեք...»⁴:

Դ Արժեքային կողմնորոշումը. խնդրահարույց ժամանակահատվածում հայ հասարակության մի մասը գտնվում էր էթնո-քաղաքական և մշակութային տարաբնույթ միջավայրերում, ուստի կարևոր էր նաև արժեքային կողմնորոշման խնդիրը: Դայոց կաթողիկոսությունը պետք է կարողանար մշակել արժեքների այնպիսի համակարգ, որը ընդունելի լիներ տարաբնույթ միջավայրերում գտնվող հայ հասարակության համար: Էթնիկական ընդհանրության ներսում միշտ առկա են արժեքային տարաբնույթ կողմնորոշումներ, որոնք կարգավորում են հարմարվելու և պահանջմունքները բավարարելու խնդիրները: Փաստորեն, Դոմսկայի կաթողիկոսությունը պետք է մշակեր հայոց

³ Լույս տեղում, էջ 30:

⁴ Տեառն Ստեփաննոսի Սիւնեաց մախագահ արիեպիսկոպոսի Դավաճառութիւն ընդդէմ երկաթնակաց. Կոստանդնուպոլիս, 1756, էջ 43:

եկեղեցու կազմակերպման նոր մոդել, որը պետք է կարգավորեր հայկական էթնիկական ընդհանրության հոգևոր միջավայրը: Այս տեսակետից հետաքրքիր է Կոստանդին Ա Բարձրաբերդցի կաթողիկոսի (1221-1267) տիտղոսաշարը. «Կոստանդին ծառայ Քրիստոսի և շնորհօք նորին կաթողիկոս ամենայն հայոց, օրհնութեամբ և ողջունիւ և սիրովն աստուծոյ՝ ծանուցանեմ լրման եկեղեցւոյ Դայաստանայց, վիճակելոց ընդ իշխանութեամբ գաւազանի սրբոց առաքելոցն Թաղեոսի և Բարդուղիմեոսի և մեծավաստակ նահատակին Գրիգորի և մերում կըսերութեանս...»⁵: Բանաձևի «ամենայն հայոց» մասը մատնանշում է, որ Դռոմկլայի կաթողիկոսությունը փորձում էր կազմակերպվել համապատասխանաբար այն սահմաններում, որը զբաղեցրել էր հայկական էթնիկական ընդհանրությունը: Դաջորդ կարևոր խնդիրը, որ լուծում է այս հատվածը Դռոմկլայի կաթողիկոսության գերակայության մատնանշումն է, քանզի գոյություն ունեին Աղվանքի և Աղթամարի կաթողիկոսությունները: Դայոց եկեղեցին ներքաշվել էր Մերձավոր Արևելքի միջազգային հարաբերությունների ոլորտ, ուստի անհրաժեշտ էր, որ նրա կենտրոններից մեկը արտաքին միջավայրում ներկայանար որպես համահայկականության կրող:

«Ամենայն» հասկացությունը իր մեջ ներառում էր Մեծ Դայքը, Կիլիկյան Դայաստանը և Մերձավոր Արևելքի՝ հայկական միջավայրերը: Այս դեպքում Դռոմկլայի կաթողիկոսության համար դժվար էր ձևավորել կենտրոն, ծայրամասեր և շփման գոտիներ: Կենտրոնի գործառույթները իր վրա կարող էր վերցնել ինչպես էթնոսի ձևավորման պատմական միջավայրը, այնպես էլ նրա կողմից հետագայում զբաղեցրած տարածքներից որևէ մեկը: Այստեղից էլ վերոհիշյալ միջավայրերից յուրաքանչյուրը իր մեջ թաքցնում էր կենտրոն դառնալու հնարավորություններ:

Ա Մեծ Դայքը կարող էր իրականացնել մշակութադավանաբանական կենտրոնի գործառույթներ, քանի որ նա հայկական էթնոսի ձևավորման պատմական և մշակույթի ավանդական միջավայրն էր. «Եւ մանաւանդ առաւել տենչմամբ սրտի սիրելով զհայրենի և պարծելի բնիկ Դայկազանց աշխարհին՝ զՏունն Արևելից՝ որ առաջին է մասն և զլուխ արիճակ իմն բոլոր աշխարհի...»⁶: Կաթողիկոսության կազմակերպման մեջ որոշակի էր եկեղեցական ավանդույթի այն հատվածը, որը վերաբերում էր Թաղեոս և Բարդուղիմեոս առաքյալներին. «...վիճակելոց ընդ իշխանութեամբ գաւազանի սրբոց առաքելոցն Թաղեոսի և Բարդուղիմեոսի»: Պատահական չէ, որ Կոստանդին

⁵ Կիրակոս Գանձակեցի, Պատմություն Դայոց, աշխատասիրությամբ՝ Կ. Ա. Մելիք-Օհանջանյանի, Երևան, 1961, էջ 301:

⁶ Դիշատակարաններ, ԺԳ դար, էջ 570:

Բարձրաբերդցի կաթողիկոսի շրջաբերականով վերականգնվում է Թադեոս առաքյալի թեմը. «...և շրջաբերական նամակ շիրմի առաքելոյն Թադեոսի տալ նմա վիճակ գշրջակայ գաւառսն և զքաղաքսն և ոսկի յոլով ի շինութիւն գաւթին...»⁷:

Բ Հայկական եթնիկական ընդհանրության մշակութադավանաբանական կենտրոն դառնալու համար Կիլիկյան Հայաստանը ևս ուներ որոշակի հնարավորություններ: Վերոհիշյալ միջավայրերից նա առանձնանում էր նրանով, որ ուներ հայկական վարչաքաղաքական սահմաններ:

Գ Մշակութային կենտրոն դառնալու ամենաքիչ հնարավորություններ ուներ Փոքր Ասիայի հայկական միջավայրը, ուստի նա աշխատում էր յուրացնել որոշակի իրավունքներ ունեցող ենթակենտրոն կարգավիճակը:

ԺԳ դարի երկրորդ կեսին հայ հասարակական-քաղաքական միտքը վերստին անդրադարձավ եկեղեցական նվիրապետության կազմակերպման պատրիարք-կաթողիկոս աստիճանների խնդրի քննարկմանը: Սա կապված էր ոչ միայն հայկական միջավայրերում ձևավորված իրավիճակի, այլև հայ-հունական և հայ-լատինական միջեկեղեցական փոխհարաբերությունների հետ: Քրիստոնեության տարածմանը զուգահեռ տեղի էր ունենում ինքնամփոփ եկեղեցական կառույցների ձևավորում: Երկարատև հակամարտությունից հետո տիեզերական եկեղեցին իր համակեցության շրջանակներում որպես նվիրապետության բարձրագույն դաս ընդունեց հինգ պատրիարքություն. Հռոմ, Կոստանդնուպոլիս, Ալեքսանդրիա, Անտիոք, Երուսաղեմ⁸: Եկեղեցական ինքնամփոփ համակարգի մյուս կարևոր հատկանիշը նվիրապետության ինն աստիճանի առկայությունն էր⁹:

Հայոց եկեղեցին ևս պետք է աշխատեր յուրացնել ինքնամփոփության համար սահմանված հատկանիշները. «...այսպես գետեղեալ սահմանեցին զինն դասս եկեղեցւոյ, Հայոցն՝ պատրիարք, Աղվանիցն՝ արքեպիսկոպոսութիւն, Սիւնեացն՝ մետրապօլիտ»¹⁰: Հայ հասարակական-քաղաքական միտքը շրջանառության մեջ էր դրել հայոց հոգևոր նվիրապետության կազմակերպման երկու մոդել՝ կաթողիկոսական և պատրիարքական: Ընդունելով, որ երկու մոդելն էլ արտահայտում են հայոց եկեղեցու ինքնամփոփությունը, անհրաժեշտ ենք համարում նշել, որ խոսքը վերաբերում է նրա կազմակերպման եթն-

⁷ Կիրակոս Գանձակեցի, էջ 311:

⁸ Поснов М. История христианской церкви (до разделения церквей-1054г.) .Киев. 1991, с. 285-300.

⁹ Սմբատ Սպարապետ, Պատաստանագիրք, էջ 64:

¹⁰ Պատմութիւն նահանգին Սիսական, արարեալ Ստեփաննոսի Օրբելեան արքեպիսկոպոսի Սիւնեաց, Թիֆլիս, 1910, էջ 106:

քաղաքական և տարածամշակութային հատկանիշներին: Սակայն հայոց եկեղեցին ավելի հաճախ օգտագործում էր կաթողիկոս տիտղոսը, քան պատրիարքը. «Եւ ասա, զի՞նչ է Պատրիարքն, ո՞չ քաղաքի միոյ եպիսկոպոս. իսկ կաթողիկոսն Յայոց՝ պետ ազգի միոյ ողջոյն

Բայց գշորսս զայսոսիկ որ աններհակ երկին, ցուցցուք. թպէտ և ի մերոցս ոմանց քար ընդ ոտն թուի:

Առաջին՝ կաթողիկոսն Աղուանից: Երկրորդն՝ եպիսկոպոսն Սիւնեաց, զոր զկնի սորա մախապատուեցին կաթողիկոսքն Յայոց: Երրորդ՝ եպիսկոպոսն Յաղբատայ, որ ունի զտեղապահութիւն կաթողիկոսին Վրաց, զտեսչութիւն բոլոր Գուգարաց: Չորրորդ՝ եպիսկոպոսն Ռշտունեաց և Մոկաց, որ նստի ի Տոսպ գաւառի յԱղթամար կղզի»¹¹: Սա հայոց կաթողիկոսութեան կազմակերպման այն կառույցն է, որը ձևավորվել էր ԺԳ դարի կեսերին:

Եկեղեցու կառավարման միավորը թեմն էր, իսկ թեմերը հավաքվում էին միտրոպոլիտությունների մեջ: Դրանց շրջանակներում ձևավորված պատրիարքական աթոռները, բացառությամբ Երուսաղեմի, իրենց բարձրացմամբ պարտական էին քաղաքական կենտրոններ լինելու իրողությանը: Այստեղից էլ ծնվել է հարցադրումը. «...զի՞նչ է պատրիարքն, ո՞չ քաղաքի միոյ եպիսկոպոս...»:

Յայոց կաթողիկոսութեան ձևավորման հիմքում ընկած էր էթնո-մշակութային համակարգ-սկզբունքը. «...իսկ կաթողիկոսն Յայոց՝ պետ ազգի միոյ...»: Յայ հասարակական-քաղաքական շրջանակները երբեմն օգտագործում էին նաև պատրիարք անվանումը, սակայն այն լայն քաղաքացիություն չստացավ: Յաշվի առնելով հայ հասարակության տարաբնակեցման առանձնահատկությունները, սահմանվեց. «Ի սոյն աստիճան (իմա՝ արքեպիսկոպոսություն) են կաթողիկոսք, որ թարգմանին ընդհանրականք. բայց ունին առաքելութիւն պատուոյ քան զարքեպիսկոպոս, զայս՝ զի ոչ եթ յիւր վիճակին միայն, այլ ընդ ամենայն տեղիս՝ ուր ազգքն իւր և համացեղքն են, ունի իշխանութիւն ձեռնադրել նոցա եպիսկոպոս և տալ զմիռնն, վասն այնորիկ անուանի և կաթողիկոս»¹²: Այս դեպքում կարևոր էր ոչ թե տիտղոսների անվանումները, այլ համակարգային հատկանիշների ձևավորումը: Դրանց դերում կարող էին հանդես գալ. ա/ եպիսկոպոսությունները որպես հոգևոր տարածքի բաժանման

¹¹ Պատասխանիք Մխիթարայ քահանայի Սկեւոացոյ Յաղագս համապատուութեան երկուտասան առաքելոց, Յերուսաղէմ, 1865, էջ 66-68:


¹² Մխիթար Գոշ, Գիրք Դատաստանի, աշխատասիրությամբ՝ Խ. Թորոսյանի, Երևան, 1975, էջ 591:

միավորներ, բ/ ծիսակարգը, որը ձևավորում էր ընդհանուր տարածաժամանակային միջավայր:

Հայկական էթնոսի տարաբնակեցման առանձնահատկությունները և քաղաքական միակենտրոն համակարգի բացակայությունը ավելի էին կարևորում եպիսկոպոսությունների դերն ու նշանակությունը: Պատկերը ավելի պարզ կդառնա, եթե հաշվի առնենք, որ թեմերի մի մասը գտնվում էին Սեծ Հայքից դուրս: Դրանք լուծում էին հետևյալ խնդիրները. ա/ ճշգրտում էին հայկական էթնոսի տարաբնակեցման սահմանները, բ/ վերահսկում էին նրա մշակութային գործունեությունը:

Քրիստոնեության շրջանակներում հայոց եկեղեցին մշակել էր ազգային ծիսակարգ: Այստեղ առավելապես նկատի ունենք Տոնակարգը, քանզի նրա միջոցով էր տարաբնույթ միջավայրերի համար ստեղծվում համաժամանակությունը, այլ խոսքով պատկանելությունը միևնույն տարածաժամանակային համակարգին: Այսպիսի իրավիճակը կարելի է բնութագրել որպես տարածաէթնոմշակութային համակարգ, քանզի կաթողիկոսության կազմակերպման համար երեք հատկանիշն էլ պարտադիր էին: Համակարգի յուրաքանչյուր մաս /տարածք, էթնոս, մշակույթ/ իր վրա վերցնում էր որևէ հատկանիշ:

Հայոց կաթողիկոսության կազմակերպման շրջանակներում որոշակի փոփոխություններ տեղի ունեցան, երբ կաթողիկոսական աթոռը Հռոմկլայից տեղափոխվեց Սիս /1292/: Չգտնվելով հայկական քաղաքական կազմավորումներից որևէ մեկի շրջանակներում Հռոմկլայի կաթողիկոսությունը սովորաբար աշխատում էր ներկայանալ վերնակենտրոն կարգավիճակով: Իրավիճակը փոխվեց, երբ կաթողիկոսությունը տեղափոխվեց Սիս և ներառվեց Կիլիկյան Հայաստանի վարչաքաղաքական համակարգում:



Հայ հասարակական-քաղաքական շրջանակներում կաթողիկոսական աթոռը Հայաստան վերադարձնելու գաղափարը միշտ կենսունակ էր: Այլ հարց է, որ նրա իրագործումը ինչ չափով էր համապատասխանում խնդրո առարկա ժամանակաշրջանում ձևավորված իրավիճակին. «... այլ կարծիս իմն բերեալ ի միտս եթէ ելանիցէ յայսմ իշխանութենէ և երթեալ ի վերին աշխարհն յարևելից. և անդ ընկալեալ լիցի պատուով կաթողիկոսութեան. և ի բաց հերքեսցի ի մենջ...»:¹³ Այս ժամանակ հայոց կաթողիկոսության վերադարձը Մեծ Հայք մնում էր որպես հեռանկար, քանզի. ա/ նրա տեղափոխումը Սիս որոշ ժամանակով հետաձգեց խնդրի լուծումը, բ/ փաստորեն Մեծ Հայքում չգտնվեց որևէ միջավայր, որը իր վրա վերցնեի կաթողիկոսության տեղափոխման առաքելությունը. «... ըստ ձեր կամաց լիցի՝ աշխարհդ այդ և այլ ոք որ կամիցի. և զմեզ թողէ՛ք ի մեր ստրուկ գերութեանս...»:¹⁴

Կիլիկյան Հայաստանի վարչաքաղաքական համակարգում ներառված Սսի կաթողիկոսությունը համահայկական կարգավիճակ յուրացնելու համար պետք է ստեղծեր կենտրոնին հատուկ կառույց: Խնդրի լուծման ուղղություններից մեկն էլ կապվում էր Ամտիոքի պատրիարքության հետ: Նրա նկատմամբ հայոց եկեղեցու հավակնությունները նոր չէին,¹⁵ սակայն այս ժամանակահատվածում դրանք շրջանառվում էին այլ խնդիրներ լուծելու նկատառումներով. «... բայց մեզ արևելից կողմանցս ոչ ինչ ի վեր բերեալ ծանուցանէր. այլ միայն այսքան համբաւէր թէ՛ խնդրեմք զաթոռն Ամտիոքու մեզ լինել. և վասն նուազեալ ժամանակիս կամիմք զմիաբանութիւն Հոռոմոց ընդ մեզ և զամենայն ազգաց...»:¹⁶ Պարզ երևում է Սսի հայոց կաթողիկոսության առաջնահերթ խնդիրներից երկուսը՝ Ամտիոքի պատրիարք տիտղոսի յուրացումը և եկեղեցիների միության հաստատումը: Միմյանց հետ փոխկապակցված այս խնդիրների լուծումը ենթադրում էր, որ Սսի կաթողիկոսությունը պետք է ձեռնամուխ լիներ հայկական դավանաբանական միջավայրի վերակառուցմանը: Այս նպատակով էլ հրավիրեցին Սսի /1307/ և Աղանայի /1317/ ժողովները:¹⁷ Ճիշտ չէր լինի եկեղեցիների միավորման խնդիրը ներկայացնել միայն Կիլիկյան Հայաստանի արտաքին քաղաքականության համատեքստում, երբ ռազմաքաղաքական օժանդակության դիմաց անհրաժեշտ էր դավանաբա-

¹³ Ստ.Օրբելեան, էջ 439:

¹⁴ Նույն տեղում, էջ 460:

¹⁵ Ա. Բոգոյան, Հայ-բյուզանդական եկեղեցական բանակցությունների վավերագրերը /1165-1178 թթ./, Երևան, 1995, էջ 192-205:

¹⁶ Ստ. Օրբելեան, էջ 448:

¹⁷ Կղ.Գալանոս, Միաբանութիւն հայոց սուրբ եկեղեցւոյն ընդ մեծի սուրբ եկեղեցւոյն Հռոմայ, հ. 1, Հռոմ, 1650, էջ 435-507:

նական զիջումներ կատարել: Այստեղ որոշակի դեր խաղաց նաև հայ հասարակության ներսում ձևավորված իրավիճակը. «Ձիաւատացեալ Յայս ժամանակին բաժնէ չորս դաս. - Ա. Սոյո միաբանքն, որք ազգային ծեսը պահելով՝ ինչ ինչ ընդունած և միաբանած են ընդ հռովմեականաց: - Բ. Սոնքք բաժանեալքն ի Սըսեցոց: - Գ. Ծայրք, յունածեսքն հայալեզուք ի Յոռոմոց տունն, յեզնկայէ մինչ ի Կեսարիա: - Դ. Միաբանող Յայք /Ունիթորք/, որք մասամբ Լատինաց ծեսն ընդունած են...»:¹⁸ Այս միջավայրերում հայոց կաթողիկոսությունը նույնաբնույթ հատկանիշներով չէր կարող կազմակերպվել, ուստի. ա/ կարող էր հրաժարվել Ա,Գ,Դ միջավայրերից, բ/ փորձել այնտեղ վերականգնել ավանդական մշակութային մոդելը, գ/ այն վերակառուցել բոլորի համար ընդունելի մոդելի շրջանակներում: Սսի հայոց կաթողիկոսությունը ձեռնամուխ եղավ երրորդ տարբերակի իրագործմանը: Այս դեպքում անհրաժեշտ էր գտնել այնպիսի մոդել, որն ի վիճակի լիներ ապահովելու հայ հասարակության դավանաբանական կազմակերպման նույնականությունը: Նման մոդելի հիմքում կարող էին դրվել այն հատկանիշները, որոնք ընդունվել էին հայկական մի շարք միջավայրերում, սակայն հայկական չէին:¹⁹ Եթե հայոց կաթողիկոսությանը հաջողվեր իրագործել հայկական դավանաբանական միջավայրի վերակառուցումը, ապա կփոխվեր նաև նրա կազմակերպման ձևը. «Եւ թեպէտ նա /իմա՝ պապականությունը/ ունի գայսքան լիութին իշխանութեան, սակայն կամի, թէ այլ եկեղեցիքն հոգացողակիցք լիցին նորա ի յառաջնորդութին հօտիցն իւրեանց. և սակս այսորիկ կամեցաւ շնորհել զանազան յատուկ իշխանութիւնս բազում այլ եկեղեցեաց, մանաւանդ նոցա, որք են պատրիարգական...»:²⁰ Վերակառուցված դավանաբանական միջավայրում հայոց կաթողիկոսության համար առավել հեշտ կլիներ յուրացնել համահայկական կենտրոնի կարգավիճակ, քանի որ նա կկազմակերպվեր նույնաբնույթ հատկանիշների շրջանակներում: Եթե Սսի կաթողիկոսությանը չհաջողվեր իրագործել այս խնդիրը, ապա հեռանկարում նա կդառնար հատվածական կենտրոն:

Վերակառուցվող մոդելում հայոց կաթողիկոսության կազմակերպումը կարելի է ներկայացնել կառուցվածքային և գաղափարական տեսակետներից: Առաջին դեպքում նա ներառվում էր տիեզերական եկեղեցու աստիճանակարգության մեջ և գլխավորում էր միայն հայոց եկեղեցական նվիրապետությունը: Գաղափարական առումով նա միավորելու էր հայկական էթնոսի բոլոր հատվածները:

¹⁸ Գ. Ալիշան, Յայապատուն, Պատմիչք եւ պատմութիւնք Յայոց, Վենետիկ, 1901, էջ 123:

¹⁹ Կղ. Գալանոս, էջ 435-507:

²⁰ Նույն տեղում, էջ 410:

Հայոց կաթողիկոսության կազմակերպման հեռանկարների շարքում կարելի է առանձնացնել մաև այն, որ փորձում էին իրենց իրավունքները տարածել ամբողջ Արևելքի եկեղեցիների վրա:²¹ Սակայն այս ծրագրերը չիրագործվեցին և Սսի հայոց կաթողիկոսությունը վերածվեց հատվածական կենտրոնի:

Այսպիսով, քննարկվող ժամանակաշրջանում հայ հասարակության կազմակերպումը կարելի է ներկայացնել որպես տարածաթեմանշակութային համակարգ, որը չուներ համահայկական քաղաքական կենտրոն: Հռոմկլայում հաստատված հայոց կաթողիկոսությունը փորձում էր յուրացնել վերնակենտրոն կարգավիճակ: Դրությունը փոխվեց, երբ կաթողիկոսությունը տեղափոխվեց Սիս և ներառվեց Կիլիկյան Հայաստանի վարչաքաղաքական համակարգում: Համահայկական կենտրոնի կարգավիճակ ունենալու համար Սսի հայոց կաթողիկոսությունը փորձեց յուրացնել Անտիոքի պատրիարք տիտղոսը և վերակառուցել ավանդական մշակութային մոդելը: Սակայն նրան չհաջողվեց իրագործել այս խնդիրները և վերածվեց հատվածական կենտրոնի:

²¹ Մ. Օրմանեան, Ազգապատում, հ. Բ, մասն Ա, Պէյրուք, 1960, էջ 1890: